

NAQQIUT

Siunnersuut 4. august 2017-imeersoq taarserpaa

Tunngavilersuut

Inatsisissanik nalilersuisarfimmit tusarniaanermut akissutip kingusissukkut tiguneqarnera tunngavigalugu siunnersuummut naqqiummik suliaqartoqarpoq. Allanguutit aaqqissuinerumut erseqqissaanermullu taamaallaat attuumassuteqarput.

Uunga siunnersuut: Pigisanit pissarsiat ilaasa akileraaruserneqartarnerat pillugu Inatsisartut Inatsisaat nr. xx, uu. qqqq 2017-imeersoq

Akileraartussaataaneq

§ 1. Soraarnerussutisiaqarsinnaatitaasut, aningaasarsianit akileraarutit pillugit Inatsisartut Inatsisaanni (aningaasarsianit akileraarutit pillugit inatsit) § 1, imm. 2. imaluunniit 2, imaluunniit imm. 2 naapertorlugit akileraaruteqartussaasut, kiisalu nunami allami, Danmarkimi imaluunniit Savalimmiuni, marloqiusamik akileraartannginnissamik isumaqatigiisummi aalajangersakkat naapertorlugit, nunaqavissutut isigineqarsinnaanngitsut Inatsisartut Inatsisaat manna naapertorlugu iluanaarutinit akileraaruteqartassapput, tassa soraarnerussutisiaqalernissaq siunertaralugu ileqqaakkanit aningaaserivinni Kalaallit Nunaanni angerlarsimaffeqartuni imaluunniit aalajangersimasumik ingerlatsiveqartuni pilersinneqarsimasuni, kiisalu inuunermik sillimmasiisarfinnit aamma soraarnerussutisiaqalernissamut aaqqissuussinernit iluanaarutinit, taakku aningaasarsianit akileraarutit pillugit inatsimmi § 39 a, imm. 1-imi aamma 2-mi piunasaqaatinit naammassinnissimagunik aamma aaqqissuussinerit § 53 A-mi soraarnerussutisiaqalernissamut aaqqissuussinerit il.il. akileraarusiisarneq pillugu danskit inatsisaanni ilaatinneqartut.

Imm. 2. Soraarnerussutisiaqarsinnaatitaasoq toqukkut qimaguppat akileraartussaataaneq unissaaq.

Akileraarusiinerumut tunngaviit

§ 2. Iluanaarutit akileraarusigassat nunatta karsianut 15,3 procentimik akileraaruserneqassapput.
Imm. 2. Akileraarusiinerumut tunngaviusut tassaapput ukiumi aningaasarsiaqarfiusumi iluanaarutit. Ukioq aningaasarsiaqarfiusoq tassaavoq qaammatsiutit malillugit ukioq ataaseq.
 Soraarnerussutisiaqarsinnaatitaasut soraarnerussutisiaqalersinnaanermut aaqqissuussineri ataatsimi arlaliuppata iluanaarutit naatsorsorneqartut akileraaruserneqartussat pineqartut akornanni

ukiup aningaasarsiaqarfiusup naanerani aaqqissuussinermi uninngasuutaannut naleqqiussilluni agguarneqassapput.

Imm. 3. Ukiumi aningaasarsiaqarfiusumi akileraaruteqartussaataanerup aallartiffiani imaluunniit uniffianit, taava ukioq aningaasarsiaqarfiusoq tassaassaaq qaammatisiutit malillugit ukioq aningaasarsiaqarfiusup ilaa akileraaruteqartussaanerup atuuffigisimasaa.

§ 3. Iluanaarutit akileraaruserneqartussaataat imatut naatsorsorneqassapput illuatungaani ukiup aningaasarsiaqarfiusup naanerani aaqqissuussinernerup aningaaticigut nalingata taakkununga ilanngullugit ukiup ingerlanerani tunniunneqartut, illuatungaaticigullu aaqqissuussinernerup aningaaticigut ukiup aningaasarsiorfiusup aallartinnerani nalingata taakkununga ilanngullugit ukiup ingerlanerani akilerneqartut taakku assigiinngissutaat. Akileraaruseriffik aningaaticigut nalinganik missingiilluni aalajangersaasinnaavoq, imaappat soraarnerussutisiaqarsinnaatitaasup aalajangersakkami matuma maleruaqqusat tunngavigalugit aningaaticigut nalinga naatsorsorsimanagu.

Imm. 2. Akileraarut Inatsisartut Inatsisaat manna naapertorlugu naalagaaffimmut allamut, Danmarkimut Savalimmiunulluunniit akilerneqarsimasoq aningaasarsianit akileraartarnermut inatsimmi § 69 naapertorlugu ilanngaaticigineqarsinnaavoq.

Imm. 3. Ukiumi aningaasarsiaqarfiusumi iluanaarutaasussaagaluq annaasanngorsimappat, taava taanna ukiumi aningaasarsiaqarfiusumi tassani ilanngaataasinnaavoq, soorluttaa aamma iluanaarutaasut aaqqissuussinermi tassanerpiaq ukiumi tulluuttuni 10-ni. Annaasaqaatit ukiumut allamut aatsaat nuutsinneqarsinnaasassapput annaasaqaat ukiumi aningaasarsiaqarfiusumi siullimi ataatsimi iluanaarutaasimasunit matussuserneqarsinnaanngippat.

Paasisutissanik nalunaarutiginninneq

§ 4. Kingusinnerpaamik februaarip aallaqqaataani aningaaseriviit §1, imm. 1-imi taaneqartut ukiup siuliani aningaasarsiaqarfiusumi akileraartarnermut aqutsisoqarfimmut paasisutissat makku nalunaarutigissavaat:

- 1) kontumik piginnittup aqqa, najugaa aamma inuup normua,
- 2) ukiup aallartinnerani aamma naanerani uninngasuutit, kiisalu
- 3) ukiup ingerlanerani iluanaarutit, tak. § 3

Imm. 2. Konto matusimagaluarpat, allamut nuussimagaluarpat assigisaanilluunniit paasisutissat nalunaarutigineqassapput.

Imm. 3. Paasisutissat imm. 1-imi 2-milu taaneqartut tunniunneqartarnerat pillugu malittarisassanik sukumiinerusunik Naalakkersuisut aalajangersaasinnaapput.

Nammineerluni nalunaarusiaq

§ 5. Soraarnerussutisiaqarsinnaatitaasut § 1, imm. 1-imi 2-milu taaneqartut, ukiup aningaasarsiaqarfiusup siuliani iluanaarutit § 3-mi taaneqartut pillugit akileraaruseriffimmut nammineerluni nalunaarusiaq atorlugu nalunaaruteqassapput kingusinnerpaamik ulloq:

- 1) 1. maaji tamanut, tassa normu 2-mi ilaatinneqanngitsunut,
- 2) 15. maaji namminersorlutik inuussutissarsiutinik ingerlatsisunut, tassa elektroniskiusumik akileraaruserfiup innersuussinera malillugu nammineerluni nalunaarusiamik nassiussisartunut.

Akiliisitsiniut

§ 6. Akileraaruseriffik akileraarummit naatsorsorneqarsimasumit akiliisitsissaaq.

Imm. 2. Ukiup aningaasarsiaqarfiusup siuliani iluanaarutinit akileraarutit akiligassanngortinneqassapput 1. septembari, kingusinnerpaamillu akiliiffissaq tassaassalluni 20. septembari.

Imm. 3. Soraarnerussutisiaqarsinnaatitaasut akileraaruserfimmu akileraarummik akiliigallarsinnaapput. Akiliineq taama ittoq ukiup aningaasarsiaqarfiusup naareernerani pisinnaavoq, taamaattorli ukiumi aningaasarsianik akileraaruteqaataasussanik naatsorsuiffiusumi 1. maajip kingornatigut pisinnaanani. Ukiumi aningaasarsiaqarfiusumi akiliuteqarnermut tunngasumut akileraarutit kinguaattoorutaasimasinnaasut erniaat ilanngullugit, aningaasanit akiliutigineqartunit taakku ilanngaatigineqaqqaassapput.

§ 7. Soraarnerussutisiaqalernissamut aaqqissuussinernit il.il. § 1-imi taaneqartunit tunniunneqartut ingerlaavartumik iluanaarutit akileraarutaannut matusissutissatut, aningaasarsianut akileraaruserneqartussanut ilanngunneqassanngillat kiisalu sulii piffissanngunngitsoq atorunnaarsitsinertut isigineqanngillat.

Imm. 2. Aningaasanik akileraarutinit matussusiissutissanik tunniussineq ingerlanneqassaaq kingusinnerpaamik ukiup iluanaarutip pissarsiarineqarfiata kingornatigut ukiumi tullermi.

Pineqaatissiissutit

§ 8. Piaaraluneerluni imaluunniit mianersuaalliorujussuarluni § 1, imm. 1-imi § 4-mik § 5-imillu unioqqutitsineq, Kalaallit Nunaanni Pinerluttulerinermi inatsit naapertorlugu pineqaatissiisoqarsinnaavoq.

Imm. 2. Inatsisartut Inatsisaata matuma kingunerisaanik najoqqutassat saqqummiunneqartut malillugit Kalaallit Nunaanni Pinerluttulerinermi inatsit naapertorlugu akiligassiisoqarsinnaavoq.

Imm. 3. Inatsisartut Inatsisaat imaluunniit najoqqutassat Inatsisartut Inatsisaata matuma kingunerisaanik saqqummiunneqartut malillugit akileeqqusissummik aalajangersaanissamik tunngavissaqartitsippata, akileeqqusissut Kalaallit Nunaanni pinerluttulerinermi inatsimmi maleruqqusat malillugit inatsisitigut pisussaataasooq pisinnaatitaasorlu akileeqqusissummik pisussaaffilerneqarsinnaavoq.

Imm. 4. Pillaammik akiligassiissutit imm. 1-imiit 3-mut naapertorlugit aalajangerneqartut nunatta karsianut nakkartassapput.

§ 9. Akileraaruseriffik isumaqarpat unioqqutitsineq akiliisitaanermi sakkortunerusumik pineqaatissiissutigineqartariaqartoq, taava Naalakkersuisut imaluunniit Naalakkersuisut taamaaliornissamut piginnaatitaata pineqartoq nalunaarfigissavaa suliassaq eqqartuussisutigoortitsinertaqanngitsumik inerneqarsinnaasoq, pineqartup ilumut unioqqutitsisimanini nassuerutigippagu aammalu piffissaatitaasup erseqqinnerusumik aalajangikkap, qinnuteqarnikkut sivitsorneqarsinnaasup, qaangiutinnginnerani akiliutissamik nalunaarummi taaneqartumik akiliumappat.

Imm. 2. Paasisitsissummut imm. 1-imi taaneqartumut tunngatillugu Kalaallit Nunaanni eqqartuussisarnermi inatsimmi maleruaqqusat unnerluussutip imarisai pillugit taamaallutik atuutissapput.

Atuutilerfia

§ 10. Inatsisartut Inatsisaat 1. januaari 2019-imiit atuutilerpoq.